

Meeqqap naartuunerani peqqissuunissaa anguniarlugu, angajoqqaanngortussallu hashimik imigassamilluunniit naartunerminni milutsitsinermilu ajornartorsiuteqartut, siusinaartumik katsorsarneqarsinnaanerannut periarfissikkumallugit Naalakkersuisutigit iliuusissanik ersarissaasoqarnissaanik kiisalu katsorsarneqareernerisa kingorna malinnaavigineqarnissaat, paasissutissanik katersisoqarnissaa siunertarlugu, Naalakkersuisut suliniuteqaqullugit aalajangiiffigisassatut siunnersuut
(Inatsisartunut ilaasortat Aleqa Hammond aamma Ruth Heilmann, Siumut)

Akissuteqaat

(Peqqissutsimut Naalakkersuisoq, Agathe Fontain)

Aappassaaneerneqarnera

Naalakkersuisut Ilaqutariinnermut Peqqissutsimullu Ataatsimiititaliaq siunnersuummik matumanga suliaqarsimanagera pillugu qutsavigaat.

Aalajangiiffigisassatut siunnersuutip siunertarai:

- qulakkeerniassallugu angajoqqaanngortussat angajoqqaanngorlaalluunniit atornerluinermik ajornartorsiuteqarsinnaasut, atornerluisuunertik tamanna pillugu katsorsarneqarnissamik neqeroorfigineqarnissaat. Taamatut siusissukkut iliuuseqarnerup qulakkiissaavaa meeqqap peqqissuunissaa, naartuunermi nalani aamma meeraanermi ukiuini siullerpaani,
- qulakkeerniassallugu katsorsarneqareernerisa kingorna malinnaavigineqarnissaat, paasissutissanik katersisoqarnissaa siunertarlugu.

Taamatut siunertaqarneq naleqqulluinnarpoq suliniummut ”Ilaqutariinnut meerartaartussanut siusissukkut iliuuseqarneq” pillugu suliniutigineqartunut, Meeqqanut Inuusuttunullu Periusisiami UKA 2011-mi saqqummiunneqartumi nassuiarneqartunut.

Pineqartoq pingaartutut nalilerneqarmat, suliniuteqarnermut tassungarpiaq aningaasanik imikkooortsitsisoqareernikuuvoq, soorlu aamma suliniutinik aallartitsisoqareersoq, siunnersuutip saqqummiunneqartup piviusunnorsinnaaneramik qulakkeerinnissinnaasunik.

Ilaqutariinnermut Peqqissutsimullu Ataatsimiititaliap ataatsimiititaliami sulinermini eqqartorisimavaa naartusut atornerluinermik ajornartorsiuteqartut pinngitsaaliinikkut katsorsarneqarsinnaanerannik periarfissaq. Naalakkersuisut pingaartuutippaat, meeqqap suli inunngorsimanngitsup ajoqusiisumik sunniinernut illersornissaa, ilaatigut imigassamat hashimullu. Misilitakkat takutippaat anaanat tamarmik meeqqatik ajunnginnerpaanik kissaattaraat, taamaattumillu atornerluinermut katsorsarneqarnissaq tamatigut orniginartittarlugu. Naartusut atorn-

erluinermut katsorsaneqarnissamut/atornerluinnginnermik attassiinnarnissamut neqeroorummut akuersaarusunngittarnerannut pequtaakkajuttarpoq nalornineq, naartusup katsorsartinermi nalaani Nuummumut aallaqqanini ilaqutaasut sinnerisa qimagaasut sapissannginneraat, imaluunniit malitsigititanik tapersersuinernilluunnit iliuuseqannginnerit. Naalackersuisut isumaqanngillat pinngitsaaliilluni katsorsaaneq iluarsissutissaasoq pitsaasoq, isumaqarlutilli nukittorsaasumik, tapersersuisumik malitseqartitsisumillu suliniuteqarnerit aqutissaasut, meeqqap suli inunngorsimanngitsup peqqissuunissaa qulakkeerniassagaanni. Naalackersuisut atornerluisunut katsorsarneqarnissamik neqeroorutit atorneqartarneranni ineriartorneq malittaraat, taamaalillutillu siumut isigisumik nalilersinnaallugu allannguuteqartitsinissaq pisariaqartinneqassanersoq.

Taamatut tunngaveqarlutik Naalackersuisut innersuusutigaat, aalajangiiffigisassatut siunnersuutip akuersissutigineqarnissaa.